



REPUBLIKA E SHQIPËRISË
AUTORITETI I KONKURENCËS
KOMISIONI KONKURENCËS

Nr. 96/4 prot.

Tiranë, më 17.03.2023

VENDIM

Nr. 966, Datë 17.03.2023

“ PËR SHTYRJEN E AFATIT TË PËRJASHTIMIT NGA NDALIMI TË MARRËVESHJES SË LIDHUR NDËRMJET SHOQËRIVE PHILIP MORRIS PRODUCTS S.A DHE KT&G CORPORATION”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Adriana BERBERI	Anëtar
Znj.	Rezana KONOMI	Anëtar
Z.	Durim KRAJA	Anëtar

Në mbledhjen e tij të datës 17. 03. 2023, shqyrtoi çështjen me:

Objekti: Shqyrtimi i kërkesës për shtyrjen e afatit të përjashtimit nga ndalimi të marrëveshjes së lidhur ndërmjet shoqërive Philip Morris Products S.A dhe KT&G Corporation.

Baza Ligjore: Neni 4, 5, neni 24, shkronja d, neni 26 dhe nenet 48-52 të ligjit nr. 9121, datë 28.07.2003 “Për mbrojtjen e konkurrencës”; ligji nr. 44/2015 “ Kodi i Procedurave Administrative i Republikës së Shqipërisë”.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi shtyrjen e afatit të përjashtimit nga ndalimi të marrëveshjes së lidhur ndërmjet shoqërive Philip Morris Products S.A dhe KT&G Corporation.

VËREN SE :

I. Procedura e ndjekur dhe Marrëveshja

Komisioni i Konkurrencës, me vendimin nr. 786, datë 25.03.2021 “Për përjashtimin nga ndalimi të marrëveshjes së lidhur ndërmjet shoqërive Philip Morris Products S.A dhe KT&G Corporation”, vendosi:

1. Të përjashtojë nga ndalimi Marrëveshjen e Distribucionit ndërmjet palëve Philip Morris Products S.A dhe KT&G Corporation.

2. Afati i përjashtimit të marrëveshjes të jetë për një periudhë 2 (dy) vjeçare, nga marrja e këtij vendimi;

Nëpërmjet shkresës nr.96, prot i AK, datë 06.02.2023, “Kërkesë për zgjatjen e afatit të përjashtimit individual të marrëveshjes kufizuese ndërmjet Philip Morris Products S.A/ KT&G Corporation”, përfaqësuesi ligjor i shoqërive Philip Morris Products S.A dhe KT&G Corporation, ka paraqitur pranë Autoritetit të Konkurrencës kërkesën e zgjatjes së Përjashtimit Individual, të dhënë me Vendimin e përjashtimit nga ndalimi, për një afat kohor shtesë deri në fund të periudhës fillestare të Marrëveshjes, 26 tetor 2023.

Pika 4 e nenit 50 “Vendimi për përjashtime individuale”, e ligjit nr. 9121, datë 28.07.2003 “Për mbrojtjen e konkurrencës” parashikon se: *Në bazë të një kërkesë, përjashtimet mund të shtyhen në kohë, nëse kushtet e përcaktuara në nenin 5 të këtij ligji vazhdojnë të plotësohen. Shtyrja mund të jepet vetëm për ndërmarrjet pjesëmarrëse, të cilat deklarojnë pëlqimin e tyre me shkrim pranë Autoritetit. Deklarata bëhet në mënyrë të pavarur nga çdo ndërmarrje dhe pranohet brenda 3 muajve para mbarimit të afatit të përjashtimit.*

Marrëveshja

Më datë 29 janar 2020, ndërmjet palëve Philip Morris Products S.A dhe KT & G Corporation u nënshkrua një marrëveshje e përbashkët tregtare (marrëveshje distribicioni), sipas së cilës Philip Morris Products S.A, ekskluzivisht, do të tregtonte dhe të shiste produkte “smoke –free” të KT & G Corporation jashtë Koresë së Jugut në këmbim të të ardhurave bazuar në shitjet e produkteve të konsumit të KT&G Corporation dhe KT&G Corporation & Philip Morris Products S.A.

Philip Morris Products S.A. përfitoi një licencë ekskluzive në lidhje me pronësinë intelektuale dhe markën KT&G Corporation. Marrëveshja i lejonte Philip Morris Products S.A të shpërndante produkte “smoke –free” si dhe produkte që janë evolucion i produkteve “smoke –free” të KT&G Corporation mbi një bazë ekskluzive dhe nuk kufizonte Philip Morris Products S.A në shpërndarjen e produkteve të veta ose të palëve të treta.

Qëllimi i kësaj marrëveshje ishte të maksimizonte potencialin për shitjet e produkteve të KT&G Corporation jashtë Koresë dhe se përdorimi ekskluziv i rrjetit të marketingut, shitjeve dhe shpërndarjes së Philip Morris Products S.A do të ishte i domosdoshëm për arritjen e këtij qëllimi dhe për rrjedhojë i domosdoshëm për arritjen e kësaj efijence dhe përfitimeve për konsumatorët.

Në vendimin nr. 786/2021, Komisioni i Konkurrencës e klasifikoi Marrëveshjen e njoftuar si një marrëveshje horizontale mes shoqërive të cilët janë konkurrentë në treg dhe që merren me tregtimin dhe shitjen e produkteve pa tym në tregun e cigareve.

Në zbatim të nenit 5 të ligji nr. 9121, datë 28.07.2003 “Për mbrojtjen e konkurrencës”, në të cilin parashikohet përjashtimin individual i marrëveshjeve nga zbatimi i nenit 4 të tij dhe Udhëzimit “Për vlerësimin e marrëveshjeve vertikale”, kjo marrëdhënie u vlerësua si marrëveshje horizontale me efekte vertikale.

Philip Morris Products S.A (PMI) është një shoqëri anonime, e themeluar sipas ligjeve të Zvicrës, me objekt aktiviteti: prodhimin dhe shitjen e produkteve të duhanit, i të gjitha produkteve që përmbajnë nikotinë dhe i pajisjeve dhe aksesoreve që lidhen me to.

PMI është prezente në Shqipëri në mënyrë indirekte që nga viti 2006, përmes Philip Morris Albania SHPK, një filial i plotë i Philip Morris SA, e cila është e angazhuar në blerjen, importimin, shitjen dhe eksportimin e produkteve të duhanit nën markat Philip Morris, Marlboro, Merit dhe L&M, si dhe mallrave të konsumit duke përfshirë pajisjet elektrike.

KT&G Corporation është një shoqëri aksionare, e themeluar sipas legjislacionit korean, me objekt aktiviteti: prodhimin dhe shitjen e cigareve dhe materialeve në lidhje me to, prodhimin dhe shitjen e ushqimeve dhe pijeve dhe gjithashtu është e specializuar në fushën e biofarmaceutikes dhe produkteve të bukuri. Markat kryesore të KT & G përfshijnë Esse, Carnival, Pine dhe LIL/FIIT.

KT&G Corporation nuk ka degë apo filial në Shqipëri.

II Analiza e Konkurrencës

Në Shqipëri, produktet konvencionale të duhanit (dhe veçanërisht cigaret) përfaqësojnë pjesën më të rëndësishme të tregut të produkteve që përmbajnë nikotinë. Produktet alternative/produktet pa djegie që përmbajnë nikotinë janë një segment i tregut në zhvillim, me dinamizëm dhe inovacion të vazhdueshëm, krahasuar me produktet konvencionale. Ekzistojnë ngjashmëri dhe ndryshime të produkteve pa djegie që përmbajnë nikotinë dhe produkteve konvencionale të duhanit, me një trend të rritjes së pranisë së tyre në treg dhe kalimit nga produktet konvencionale në ato alternative nga konsumatorët.

Në bazë të nenit 3, pika 7 të ligjit nr. 9121 datë 28.07.2003 “Për mbrojtjen e konkurrencës”, dhe Udhëzimit “Për përcaktimin e tregut përkatës”, tregu përkatës përbëhet nga tregut përkatës i produktit dhe tregu përkatës gjeografik.

Referuar analizës së tregut përkatës, në raportin e vlerësimit të përjashtimit nga ndalimi të kësaj marrëveshje, tregu përkatës i produktit u përcaktua **tregu i shitjes me shumicë të produkteve pa djegie që përmbajnë nikotinë** dhe përkatës gjeografik u përcaktua **territori kombëtar i Republikës së Shqipërisë**.

Bazuar në vlerësimet e brendshme të shoqërisë PMI konstatohet se tregu i produkteve pa djegie, gjatë periudhës së përjashtimit (2020-2022), vazhdon të jetë një treg shumë i vogël krahasuar në tregun e shitjes së cigares tradicionale duke zënë gjatë vitit 2020 rreth 1.6 % , vitit 2021 rreth 2.3% dhe vitit 2022 rreth 4% të gjithë tregut të cigareve, por me dinamika në rritje në tre vitet e fundit.

Pjesa e tregut që zë PMI në tregun e produkteve pa djegie ka qenë 99% për vitin 2020, 95% për vitin 2021 dhe 70% për vitin 2022. Nga vlerësimet e mësipërme është e qartë se hedhja në tregun shqiptar të produkteve KT&G nga PMI më 9 gusht 2021, nuk ka pasur ndonjë efekt negativ në produktet pa djegie, pasi pjesëmarrja në treg e PMI në segmentin në fjalë ka rënë pas hedhjes në treg të produkteve përkatëse sipas Marrëveshjes.

Si rrjedhojë, hedhja në treg e produkteve KT&G në tregun shqiptar nga PMI nuk pati ndonjë efekt negativ në hyrjen apo rritjen e konkurrentëve aktualë apo potencialë në Shqipëri.

Gjithashtu, nga këndvështrimi i kërkesës dhe në veçanti nga këndvështrimi i përdoruesve të duhanit që kanë mbushur moshën ligjore, produktet pa djegie që përmbajnë nikotinë janë relativisht produkte të reja, në zhvillim të vazhdueshëm dhe të mbështetur nga konkurrenca e ashpër. Shkalla e zëvendësueshmërisë midis këtyre produkteve dhe produkteve tradicionale me djegie të duhanit është e kufizuar dhe asimetrike, pasi përdoruesit e produkteve me djegie mund të kalojnë në produkte pa djegie që përmbajnë nikotinë, por përdoruesit e produkteve pa djegie që përmbajnë nikotinë nuk do të kalojnë domosdoshmërisht në cigaret tradicionale, puro etj.

Periodha e propozuar për shtyrjen e përjashtimit të marrëveshjes, deri më datë 26 tetor 2023, nuk pritet të sjellë ndryshime të ndjeshme në strukturën e tregut të shitjes me shumicë të produkteve pa djegie që përmbajnë nikotinë dhe për këtë arsye miratimi i shtyrjes së përjashtimit nuk do të sjellë efekte mbi konkurrencën në treg.

PËR KËTO ARSYE:

Komisioni i Konkurrencës, bazuar në nenin 5, nenin 6, nenin 24, shkronja (d), nenin 26 dhe nenin 50, pika 4, të ligjit nr. 9121, datë 28.07.2003 “Për mbrojtjen e konkurrencës”,


VENDOSI:

1. Të shtyjë afatin e përjashtimit nga ndalimi të marrëveshjes së lidhur ndërmjet shoqërive Philip Morris Products S.A dhe KT&G Corporation, deri në datë 26 tetor 2023.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.


Ky vendim hyn në fuqi menjëherë.

KOMISIONI I KONKURRENCËS


Leida MATJA


Zv/Kryetar


Rezana KONOMI


Anëtar

Adriana BERBERI


Anëtar

Durim KRAJA


Anëtar

